

113年花蓮縣吉安鄉語文競賽客家語朗讀文章國中學生組（海陸腔）

編號 1 號

【甘蔗下个蟬仔】羅紫云原作

屋脣該埕¹竹甘蔗²種幾下年咧，當大叢，斬忒又會過綻筍，繼續煞猛生到青里里仔，長目多汁，清甜好食。

逐年大體對五月開始，日日到臨晝仔，就會有一群著等青衫，當靚、當得人惜，頭大尾尖、翼長个草蟬，細細仔像手指尾恁大隻定定，黏在這長長青色个甘蔗葉下，盡命拈在該啦歌哩曲，鬧熱煎煎。佢兜總係唱等：「揸揸揸啲³——揸揸揸啲——」甜美个歌聲，一直到下晝兩點零正會煞棚，完全無喊恻。

草蟬下班，續等嫫牯蟬⁴跔等上棚，毋過，嫫牯蟬係黏在竹甘蔗脣該叢榮榮个苦棟樹頂，佢算係最大隻个蟬仔，臉身著等一身烏色个西裝盡派頭，大聲唱等屬於佢兜个愛戀歌：「蟬——蟬蟬蟬！蟬——蟬蟬蟬！」佢兜做下背等一臺自家製造个放送頭⁵，亮亮个聲放送到盡遠都聽得著。佢心情好个時節，就安腦佢兜唱歌仔當好聽，心情毋好時，又試著佢兜吵耳塞窟。但係一想著佢兜來到這世界上，斯有短短幾日仔，就當佩服佢兜恁勇敢、恁煞猛

¹ 埕：音 pu；量詞，堆。

² 竹甘蔗：音 zhug gam` zha~；綠皮的甘蔗。

³ 揸揸揸啲：音 rham+ rham+ rham+ rhi；草蟬的叫聲。借字。

⁴ 嫫牯蟬：音 ma gu` sham；此指臺灣熊蟬。

⁵ 放送頭：音 fong` sung` teu；麥克風。

打拚个精神，來完成唯一愛做个聲事⁶——傳宗接代，該就無麼个好怨嘆，乜原諒佢兜个嘶骸另命咧。

在這鬧熱个時節，佢兜張凳仔恬恬坐在甘蔗脣詳細聽，還會發現佢兜毋係儘採唱个哦，曉得照順序、有條理，成時獨唱、成時合唱輪等來，像有人指揮樣，聲音有嘹亮、低沉；時大、時細，所發出个聲無幾共樣，有个較尖；有个較溫柔。其實，蟬仔有當多種，有一年、三年、五年、十三年、十七年个，長年都戴在泥竇肚不見天日。在暗摸摸个烏泥裡肚，培養破土个熱情；在多年个等待中，化地底个能量做聲量，衝破重圍飛出來，就係為著這短短幾日个自由。

佢心肝肚緊想：這埕甘蔗無落肥，敢係因為聽了蟬仔熱情嘹亮个歌聲，正緊生緊高緊榮？該恁佢人，乜愛像蟬仔恁知足，知恩圖報，逐日天轉笠嫫花，這一生人就多姿多彩咧！

⁶ 聲事：音 shang` she+；工作。

113年吉安鄉語文競賽客家語朗讀文章國中學生組（海陸腔）

編號2號

【線上學習】李秉璋原作

神奇、神奇盡神奇，上課毋使趕，交通毋會塞，想愛學麼个斯學麼个。先生任恁擇，時間任恁選，三更半夜乜做得，先生講到生趣又清楚。佢做得係學生仔个先生，乜做得做先生个先生，總講佢桃李滿天下，毋使準備拜師禮，毋使繳學費，你想愛學，佢斯會教。

不管你係巧神¹抑係蠢當²，佢全都收。佢無擇學生仔、無擇時間、無擇地方，單單擇你，擇你想愛學个心。這係學習个革命，這係時代个轉變。來著急、來著遽，跔得著大進步，斯像膺身脣有仙人指點，武功大進。

馬桶毋曉修理有人教，鏈鋸毋曉發，一步一步來，秘訣³教你知。網路線个接頭線路毋曉排，有人教你色目愛分明，五彩六色照順序，工具又特別，頭尾一下摺佢夾落去，接頭插好網路就通。

雖然講一隻銀角仔毋會響，毋過先生大部分都係自家在該做戲，講到口水波潑、精神飽滿、歡頭笑面，斯像毋會恹合有耐心！一遍教毋會，過教一遍，你想愛學幾多回斯學幾多回，學到

你自家毋愛學。

千里緣分一線牽，天下全在恁彈指之間。現代生活當舒適，冷氣吹，彈指間，毋使出門、毋使尖車，想愛仰般學斯仰般學。就算係疫情時節，學校个線上教學，有一息無恁自由，毋過乜有人非常認真，一片聽課，一片查資料，正經係講一知三，師傅渡入門，修行在個人。上課講義自家留，毋使抄，三隻快速鍵一撇，滑鼠一箍，講義黏時留下來。

當日上課紀錄先生有錄製，驚你單單係「用手機上課定」，人毋知走哪位去。所以先生上課會問問題，一半問，一半係在該點名，看你心思有在這無？認真上課个，回答無問題，又講頭斯知尾，無用心个乜無問題，平平無問題，這個係毋知半項，所以無問題。連先生喊佢回答，佢也像在人間消失，無鏡頭、乜無回答聲，訊息欄裡肚乜無留字，所以佢正經係「用手機上課定」。

線上學習，成就隨在人，逐儕有選擇个自由，斯愛對自家个人生負責定。對自家未來正經个慷慨，就係摺一切都貢獻分現時。今日个恁，成就韶早个恁。

¹ 巧神：音 kiau' shin；聰慧，屬具特殊能力的聰明。

² 蠢當：音 ngong' dong'；呆愚、傻呼呼。

³ 秘訣：音 bi' gied；訣竅，指事物的要領、竅門。

113年吉安鄉語文競賽客家語朗讀文章國中學生組（海陸腔）

編號3號

【火燒崗頂】李宜諭原作

在鄉下，鬧鬧熱熱個舊曆年一過啊忒，又伸著恬靜個生活。毋過，行過消防隊時節，會看著該一臺一臺個消防車駛出車庫停在路脣，雖然看毋著無閒直掣個身影，乜聽毋著緊張刺耳個警報聲，毋過，空氣裡背因等一息仔愛停動個電波，一種神經擱縲個氣氛。

舊曆二月係美濃人掛紙個時節，恁多年天時反常，春雨慢到，二月個崗頂燥絲絲仔，所以，第一隻拜六掛紙個臨暗仔開始，就會看著崗頂出現冲天個煙，續下來紅紅個火蛇就飄出來咧，阿姆哀喲，火燒山哩喲！消防車個身影像走相追樣舂等出，警報聲在街路咻等過¹，一臺、兩臺、三臺……總概出動，毋過，斷烏過後就難耐咧，高不將換手腳流掠個阿兵哥，擎等鑷仔、刀嫲摻附近個竹頭、樹仔、草劈出斷火路。

第二日打早，「轟……叮叮叮叮、叮叮叮叮」直升機個聲音就在天頂來來去去響無停。「直升機去美濃湖舀水咧喲！」美濃湖黏時鬧熱起來，大家遽遽號隻好位仔，坐下來定定仔看等直升機在湖面舀水個景象。遠遠飛過來個直升機，會到美濃湖個時

節，就會慢慢仔降下來，等到肚屎下背個大袋仔揆著²水面，佢就會煞煞摻袋仔向前拖一下正擲起來，淦淦一大袋個水就吊起來咧，續等摻這恁大袋個水晃晃激激³吊到廣善堂背個山崗頂，對半天高倒啊下，恁大袋個水黏時化做一陣白白個濛煙散淨淨。

天頂個直升機一輪又一輪，對打早飛到斷烏；山腳下消防車個水一管又一管緊洩；崗頂紅紅個影跡對山前遶到山背、對山坪遶到山頂。更深夜靜個暗晡，總會聽著竹頭燒到劈哩叭啦⁴響個聲，火屎就跔等風滿哪仔飛，天光時節，家家屋屋個屋頂還過大路、田肚全全係烏烏個火屎。崗頂個火日燒夜燒，山下個消防車、救護車、阿兵哥乜日夜掌等……下把仔伸著冲天個白煙，大家想愛歇睏一下個時節，紅紅個火尾⁵嘎又好恬恬仔飄出來，就恁樣一直愛燒到掛紙結束。

火燒山崗對環境、對山林個破壞非常大，看著劈竹頭個阿兵哥分樹杈仔劃到手摻面都血流血著，實在分人毋盼得，掛紙個方式係毋係需要鄉親好好來思考、參詳呢？

¹ 咻等過：音 hīu nen' go~；疾駛而過。

² 揆著：音 dud do'；碰觸到。

³ 晃晃激激：音 gong gong geb' geb'；因搖晃使得水從容器中溢出來。

⁴ 劈哩叭啦：音 pi li pa la；竹子燒裂的聲音。

⁵ 火尾：音 fo' mui'；火焰的頂端。

113年吉安鄉語文競賽客家語朗讀文章國中學生組（海陸腔）

編號4號

【鷓鴣飛啊飛】張瑞玲原作

打早，日頭正對東片鷓鴣嘴¹個後背爬起來，輝煌又晟眼个金線射落天頂。佢踩等該臺一騎斯歸路響个老自行車，來到佢个百果園，還話著講今晡日日頭一出斯來到這位，算當早咧！無想著，正踏落園肚，隔壁種大梨个阿權哥斯在該大聲喊咧！「喂！日頭恁高咧正到哦，敢做有事？」唉！

佢都恁早咧，還輸佢，這阿權哥係歸暗晡毋使睡係無？做麼个做得七早八早斯來到這位？心肝肚還想等，嘴叮又毋肯認輸，對嘴斯應佢：「無啦！毋係來做事，係來看鷓鴣得似²啦！」

佢个園在龍崗圍等个窩肚，若係堵著像今晡日恁樣个好天時，打早斯會有三、四隻大鷓鴣，在四圍个山嶺頂飛啊飛仔。

摻阿權哥个嘴鼓都還言打煞，聽著遠遠个位所傳來「咻！咻！」个聲，鷓鴣出來咧！阿權哥看著鷓鴣出來，做等个山園事頭也無掛做咧，跔等一陣來拵接梨仔个工人，坐在佢該工寮个蔭影³下欣賞這齣大自然个表演。

看佢兜閉開長長个翼胛、跔等燒氣，慢慢迂、定定仔盤，越迂越高、緊盤緊遠，背尾變成天邊个一隻烏點，當像優雅个天頂

王者，對天頂看等佢兜守護个土地。

成下仔，會看著佢兜胸挺挺、目叮叮停在脣頭个樹樞頂高，好恬恬無聲無哨斯春往下，一矚目轉身又飛往上，尖尖利利个爪叮，拖等一尾挨著神頭个蛇哥，斯一路「咻！咻！咻！」風神哎哎⁴飛落密密个樹林裡肚。

又成下，看佢兜在高高个天頂盤來飛去，忽然間，兩片翼胛一收，對天頂直直粹往下，佢个心肝肚還想等：「這隻鷓鴣這下穩死無命咧！」毋過，看佢強強都會撞著地泥咧，翼胛一閉、利爪一伸，在頓恬个一矚目時間，佢該雙利爪叮，毋知哪時抓著一隻臘身還在該扭啊扭个大老鼠，一轉身又飛到半天高咧！

歸陣人看鷓鴣表演看到嘴擘擘仔，有人講：「難怪，在這坵山園做恁久个事，難得看著蛇哥，斯係有這兜鷓鴣守顧這搭土地，戴在這四圍个老嫩大細正有好平安生活啊！」

¹ 鷓鴣嘴：音 rhau⁺ po zui^ˊ；東勢東方山峰名，華語稱鳶嘴山。

² 得似：音 ded sii⁺；語助詞，表確定。

³ 蔭影：音 lim⁺ rhang^ˊ；樹下照不到太陽的地方。

⁴ 風神哎哎：音 fung^ˋ shin ngai^ˋ ngai^ˋ；洋洋得意。